



МҰХТАР ӘУЕЗОВ АТЫНДАҒЫ ОҚУ КОЛЛЕДЖІ – ІРГЕЛІ ОҚУ ОРНЫ

2002 жылы негізі қаланған Шымкенттегі Мұхтар Әуезов атындағы Оңтүстік Қазақстан мемлекеттік университеті (қазіргі ОҚУ) колледжі нарықтың заманауи қажеттіліктерін қанағаттандыра алатын білікті орта буын мамандарын даярлауды қамтамасыз етіп келетін іргелі оқу орны.

Техникалық және кәсіби білім беру саласындағы сапалы мамандарды даярлау жөніндегі стратегиялық міндеттерді жүзеге асыру мақсатында 2016 жылы 1 сәуірде университет ректоры Жұмахан Үшкөмпірұлы Мыржалықовтың №96 нк бұйрығы негізінде колледж университеттің құрамдас бөлігі ретінде қайта ашылған. Колледжді әр жылдары Е.Айтбаев, Б.Мақажанов, Н.Тастыбаев, Ш.Джалымбетов, Қ.Әжібеков, Д.Әбдірайымов, Б.Сапарбаев сияқты білікті басшылар басқарған.

Оқу орнында оқытушылардың біліктілігін арттыру жұмыстарына ерекше мән берілуде. Қазіргі уақытта колледжде 102 оқытушы, соның ішінде 2 ғылым докторы, 35 магистр, 5 жоғары дәрежелі педагог-шебер, 13 педагог-сарапшы, 6 педагог-модератор, бірінші және екінші санаттағы оқытушылар еңбек етуде.

2018 жылдан бері тарих ғылымының докторы, профессор Әлібек Нұрмаханұлы Сейдехан Мұхтар Әуезов атындағы ОҚУ колледжінің директоры қызметін атқарып келеді. Ол 140-тан астам ғылыми және ғылыми әдістемелік еңбектердің авторы, «Жоғары оқу орнының үздік оқытушысы» мемлекеттік грантының иегері, ҚР білім беру саласының құрметті қызметкері. Былғы жоғары оқу орнының 80 жылдығына орай мерейтойлық төсбелгімен марапатталып отыр.

Колледж мемлекеттік лицензия негізінде еңбек нарығында сұранысқа ие 15 мамандық бойынша мамандарды даярлайды. Атап айтқанда, бізде түсті металлургиясы; құрылыс бұйымдары мен конструкцияларының өндірісі; мұнай және газды қайта өңдеу технологиясы; трикотаж, тоқыма, галантерей бұйымдарының технологиясы; электрмен қамтамасыз ету (салалар бойынша); бағдарламалық қамтамасыз ету (түрлері бойынша); бастауыш білім беру педагогикасы мен әдістемесі; дене тәрбиесі мен спорт; есеп және аудит; киім дизайны; тигін өндірісі және киімдерді модельдеу; ғимараттар мен құрылыстарды салу және пайдалану; ветеринария; тамақтандыруды ұйымдастыру мамандары даярланады. Оқу орнында 2 бөлім мен 8 пәндік-циклдік комиссия жұмыс істейді.

Қазіргі уақытта колледжде 1520 студент, соның ішінде 1223-і мемлекеттік тапсырыс негізінде білім алуда.

Worldskills Shymkent – 2023 қалалық чемпионатында колледж 9 құзыреттілік бойынша қатысып, 1 бірінші, 3 екінші, 3 үшінші орындарды иеленіп, мерейлі болды. Флористика құзыреттілігі бойынша біздің колледж құзыреттілік орталығы ретінде чемпионат ұйымдастырып, осы құзыреттіліктің жетекшісі республикалық чемпионатқа жолдама алып отыр.

Дуальды білім берудің құндылығы әрбір студент үшін оқу үдерісінің алғашқы кезеңдерінде өндірістегі жұмыстарға қызметкер ретінде қосылу мүмкіндігімен ерекшеленеді. Осы орайда Шымкенттегі бірқатар өндіріс орындарымен келісімшарт жасалып, өзара тығыз байланыс нығая түскен.

Студенттер колледждің қоғамдық өміріне белсене қатысады.

Біз өзіміздің талантты түлектерімізді де орынды мақтан тұтамыз. Олардың арасында Нұрайым Шақимгерен – Түркістан облыстық мәслихаты сегізінші шақырылымының депутаты атанып отыр.

Мұхтар Әуезов атындағы Оңтүстік Қазақстан университетінің биылғы 80 жылдық мерейтойы одан әрі өз жалғасын

табуда. Жоғары оқу орнына «Зерттеу университеті» мәртебесінің берілуі – бәріміз үшін үлкен мақтаныш. Халықаралық студенттер күні мерекесіне орай Мұхтар Әуезов атындағы Оңтүстік Қазақстан университетінің Бас ғимаратында ОҚУ колледжінің бірінші курс студенттеріне арналған студентке қабылдау рәсімі өтті. Алдымен білім ордасы жайлы бейнеролик көрсетілді.

Салтанатты жиынды ашқан Мұхтар Әуезов атындағы ОҚУ колледжінің директоры, тарих ғылымының докторы, профессор Ә. Н. Сейдехан:

– Сіздердің бәріңізді университетіміздің 80 жылдық мерейтойымен шынайы құттықтаймын! Бай тарихы бар жоғары оқу орнынан қаншама талантты түлектер түлеп ұшқан. Олардың арасында көрнекті мемлекет және қоғам қайраткерлері, ғибратты ғалымдар, министрлер, өкімдер, тағы басқа да салалардың танымал тұлғалары бар. Осы университет құрамындағы біздің колледжде де студент жастарға сапалы білім мен саналы тәрбие беру жолында көптеген ізгілікті де игілікті іс-шаралар жүзеге асырылуда. Бүгін қолдарына студенттік билет ұстап отырған шәкірттерімізді білім нәрімен терең сусындап, жоғары жетістіктерге жете беруіне игі тілектестігімізді білдіреміз! – деді.

Бұдан кейін Әлібек Нұрмаханұлы озат оқытушылар мен студент жастарға марапат тапсырды. ҚР Ғылым және жоғары білім министрлігінің Ыбырай Алтынсарин атындағы төсбелгісі колледж оқытушысы Надежда Победовна Айтөрееваға табысталды. Бұдан бөлек еңбегі еленген Олжас Ақжолұлы, Нұрлан Жолымбекұлы, Гүлнар Тұрғанқызы, Меруерт Абдықасымқызы секілді оқытушылар «Amanat» партиясы Түркістан облыстық филиалының төрағасы Алтынсары Үмбетөлиевтің Алғыс хатымен, қоғамдық жұмыстарда белсенділік танытқан Маржан Кеңесбек, Инжу Кеңесбек, Елдос Бөгенбай секілді студент жастар Мұхтар Әуезов атындағы ОҚУ-дың бірінші проректоры Қайрат Еңбекшіұлы Нұрманбетовтің Алғыс хатымен, ал Дана Сағынтай, Гүлнұр Жоламанова, Рүстем Бақытұлы Мұхтар Әуезов атындағы ОҚУ колледжінің директоры Әлібек Сейдеханның Алғыс хатымен марапатталды. Шара соңы қызғылықты концерттік бағдарламаға ұласты.

Шымкенттегі «Буревестник» спорт кешенінде Мұхтар Әуезов атындағы Оңтүстік Қазақстан университетінің 80 жылдық мерейтойына орай колледж оқытушылары арасында волейболдан командалық жарыс өтті. Жарыстың ашылу салтанатында Мұхтар Әуезов атындағы ОҚУ-дың бірінші проректоры Қайрат Нұрманбетов, Мұхтар Әуезов атындағы ОҚУ колледжінің директоры Әлібек Сейдехан құттықтау сөз сөйлеп, спорт – денсаулық кепілі екенін айта келе жарысқа қатысушы командалардың бәріне сәттілік тіледі.

Нәтижесінде Түркістан индустриалдық құрылыс колледжі жарыс жеңімпазы атанды. Мұхтар Әуезов атындағы ОҚУ колледжінің ұжымы жүлделі екінші орынды еншіледі. Шымкент аграрлық техникалық колледжі үздік үштікке ілікті. Олардың бәріне Диплом, кубок, медаль мен бағалы сыйлықтар табыс етілді.

**Қарлығаш ҮСЕНҚҰЛОВА,
Мұхтар Әуезов атындағы
Оңтүстік Қазақстан университеті
Ақпараттық білім беру орталығының
кітапханашысы, ОҚУ колледжінің
оқытушысы**